

**RESOLUCIÓN REITORAL DO 22 DE MARZO DE 2017 POLA
QUE SE PUBLICA A CONVOCATORIA DO V PREMIO DE
CREACIÓN DE MATERIAIS E RECURSOS DOCENTES CON
PERSPECTIVA DE XÉNERO DA UNIVERSIDADE DE VIGO
ANTONIA FERRÍN MOREIRAS**

A introdución da perspectiva de xénero é un indicador de calidade da docencia universitaria e a excelencia só se pode acadar cunha ensinanza onde a transmisión de valores igualitarios para a formación do alumnado e a súa capacitación profesional se aplique transversalmente. Esta convocatoria pretende crear ferramentas para facilitar esta labor a todo o profesorado.

Por isto, e en virtude das facultades outorgadas pola Lei Orgánica 6/2001, de 21 de decembro, modificada pola Lei 4/2007, de 12 de abril de Universidades e o artigo 58 do Decreto 7/2010, de 14 de xaneiro, polo que se aproban os Estatutos desta Universidade,

ESTA REITORÍA RESOLVE:

Convocar o V Premio de creación de materias e recursos docentes con perspectiva de xénero da Universidade de Vigo ANTONIA FERRÍN MOREIRAS segundo as bases que se publican canda esta resolución.

Contra esta resolución, que esgota a vía administrativa, poderase interpoñer un recurso perante a xurisdición contencioso-administrativa, no prazo de dous meses contados dende o día seguinte ao da súa publicación, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

As persoas interesadas poderán optar por interpoñer contra esta resolución un recurso de reposición, no prazo dun mes contado a partir do día seguinte ao da súa publicación (ou dende o día seguinte de recibir esta notificación), perante o mesmo órgano que a ditou. Neste caso non se poderá interpoñer un recurso contencioso-administrativo ata que sexa resolto expresamente ou se producise a desestimación presunta do recurso de reposición interposto, segundo o previsto no artigo 123.2 da Lei 39/2015, do 1 de outubro, do procedemento administrativo común das administracións públicas.

Dilixencia para facer constar que esta resolución se publica no taboleiro de anuncios dos rexistros da Universidade de Vigo o vinte e dous de marzo de dous mil dezasete.

Vigo, 22 de marzo de 2017
A DIRECTORA DA UNIDADE DE
IGUALDADE

Ana Isabel González Penín

Vigo, 22 de marzo de 2017

O REITOR

Salustiano Mato de la Iglesia

Universidade de Vigo -
Rexistro Xeral

Saída Nº. 201700005036
23/03/17 12:17:00

Convocatoria do V Premio de creación de materiais e recursos docentes con perspectiva de xénero da Universidade de Vigo ANTONIA FERRÍN MOREIRAS

A Universidade de Vigo convoca o V Premio de creación de materiais e recursos docentes con perspectiva de xénero da Universidade de Vigo ANTONIA FERRÍN MOREIRAS, co obxectivo de incentivar a elaboración deste tipo de ferramentas para contribuír á excelencia docente universitaria e premiar os mellores recursos.

A introdución da perspectiva de xénero é un indicador de calidade da docencia universitaria e a excelencia só se pode acadar cunha ensinanza onde a transmisión de valores igualitarios para formar ao alumnado e capacitálo profesionalmente se aplique de xeito transversal.

Antonia Ferrín Moreiras (Ourense, 1914- Santiago de Compostela, 2009) foi a primeira muller en formar parte do cadro docente da Facultade de Matemáticas da Universidade de Santiago de Compostela e a primeira persoa en defender unha tese doutoral nesta facultade (1963). Foi tamén pioneira en realizar traballos de investigación en Astronomía . Depurada durante a Guerra Civil e apartada da docencia durante 3 anos, rematada esta, acabou os seus estudos de Matemáticas na Universidade Central de Madrid como alumna libre. En 1963 foi nomeada catedrática numeraria de Matemáticas na Escuela de Magisterio Santa María de Madrid posto que compatibiliza co de profesora adxunta na Cátedra de Astronomía da Facultade de Matemáticas da Universidade Complutense ata a súa xubilación en 1984. É considerada a primeira astrónoma galega.

BASES:

1. Obxecto e persoas destinatarias:

O obxecto desta convocatoria é incentivar a elaboración de material e recursos para a docencia universitaria en igualdade e/ou con perspectiva de xénero por parte do profesorado da Universidade de Vigo.

As propostas de materiais e recursos docentes deben estar inspiradas polo respecto á igualdade entre homes e mulleres de conformidade coa Lei orgánica 3/2007, do 22 de marzo para a igualdade efectiva de mulleres e homes tal e como establece o apartado b do artigo 3 do Decreto 222/2011, do 2 de decembro, polo que se regulan as ensinanza universitarias oficiais no ámbito da Comunidade Autónoma de Galicia.

Premiaranse aqueles materiais e recursos docentes orixinais e inéditos en formas diferentes elaborados polo profesorado da Universidade de Vigo de xeito individual ou colectivo que sirvan para empregarse como soporte docente e de referencia das clases presenciais e/ou virtuais dunha asignatura ou grupo de asignaturas de calquera área de coñecemento.

A convocatoria está dirixida a todo o profesorado da Universidade de Vigo.

O persoal docente con vinculación permanente coa Universidade poderá participar de xeito individual ou en grupo. O resto, só poderá presentarse nun grupo no que polo menos unha das persoas que o compoñen, que exercerá a coordinación, teña vinculación permanente. No grupo poderá participar persoal externo á Universidade de Vigo.

Tanto a persoa que presente a súa solicitude a título individual como quen coordine un grupo deberán ter docencia asignada no POD para o curso 2016-2017.

Cada persoa ou grupo pode presentar máis dunha proposta. Cada proposta deberá presentarse en solicitude separada.

2. Presentación de solicitudes e prazo

As persoas interesadas remitirán á Unidade de Igualdade (Edificio CACTI – Campus Universitario 36310 VIGO) a documentación requirida e, se fose o caso, a complementaria, presentándoa nos rexistros auxiliares ou xeral da Universidade de Vigo e nos lugares indicados no apartado 4 do artigo 16 da Lei 39/2015, do 1 de outubro, do procedemento administrativo común das administracións públicas.

A documentación será presentada nun sobre dirixido á Unidade de Igualdade onde figurará escrito no exterior como única referencia da solicitude, o nome do material ou recurso docente presentado. Este sobre conterá:

- a) A memoria e, se fose o caso, a documentación complementaria, conforme ao anexo II desta convocatoria acompañada dunha versión electrónica de toda a documentación en soporte cd ou memoria usb.

Na memoria e documentación complementaria non poderá aparecer ningún nome nin referencia que permita identificar a autoría.

- b) Un sobre pechado coa solicitude conforme ao anexo I desta convocatoria rexistrada ou selada coa data de presentación. Este sobre deberá ter escrito no exterior, como única referencia, o nome do material ou recurso docente escrito no primeiro sobre e deberá ir dentro deste.

O prazo para a presentación de solicitudes será de 3 meses a contar dende o día da publicación desta convocatoria.

Dende a data de resolución do concurso as persoas participantes non premiadas teñen un prazo dun mes para recoller na Unidade de Igualdade o material enviado, rematado eses 30 días pasarán a propiedade da Universidade de Vigo.

3. Dotación e natureza dos premios

O Premio de creación de material e recursos docentes con perspectiva de xénero da Universidade de Vigo Antonia Ferrín Moreiras conta coa seguinte dotación:

Primeiro premio: 3.000 euros

Accesit: 1.500 euros

O financiamento destes premios será por conta da partida orzamentaria 2017 0000 421S XEN do vixente subprograma de gastos da Unidade de Igualdade.

O xurado resérvase o dereito a declarar desertos o premio e/ou o accesit.

O importe dos premios concedidos será xestionado pola Unidade de Igualdade e deberá ser empregado para actividades relacionadas coa educación superior ou investigación con valores igualitarios tales como asistencia a encontros, formación, invitación de conferenciantes, publicación do material premiado, publicación de estudos etc que contribúan ao impulso da introdución da perspectiva de xénero na docencia, investigación e transferencia do coñecemento. Os gastos serán propostos pola persoa ou grupo premiado.

Os materiais e recursos premiados, nos que constará a autoría, serán postos a disposición da comunidade universitaria a través da web da Unidade de Igualdade e deberán ofrecerse ao alumnado na plataforma TEMA.

Coa autorización das autoras e autores, a Unidade de Igualdade poderá publicar na súa web materiais e recursos que non fosen premiados.

4. Criterios de valoración e xurado:

Os premios valoraranse segundo os seguintes criterios:

- Introducción da perspectiva de xénero na aprendizaxe: 20
- Trasmisión de valores e principios que promovan a igualdade de xénero: 20
- Calidade do material ou recurso docente: 15
- Uso dunha linguaxe inclusiva correcta: 15
- Grao de innovación e creatividade dos materiais ou recursos presentados: 10
- Metodoloxía didáctica: 10
- Bibliografía e fontes actualizadas: 10

Salvo para materiais dirixidos á ensinanza de linguas estranxeiras nos que poida presentar máis dificultade, os materiais e recursos deberán promover o uso da lingua galega.

O xurado deste premio será nomeado mediante resolución reitoral unha vez finalice o prazo de presentación de solicitudes e será publicado na páxina web da Unidade de Igualdade. O xurado poderá contar coa asistencia de persoas expertas externas.

A decisión do xurado será inapelable.

A presentación a este Premio implica a aceptación das súas bases.